

Co passaintan impiegats ed abitants da la Chüra Lischana las Festas?

## Nadal in ün nouv dachasa

Da rivar illas localitats da la Chüra Lischana a Scuol es actualmaing sco da rivar ill'aigna stüva: Decoraziuns da Nadal imbellischan l'ambiant prüvè ed i savura da pastinas fattas sves. Ma che sentimaints as zoppin davo las bellas culissas?

(anr/mfo) «Eu n'ha chattà quia ün nouv dachasa», disch ün hom vegl. Seis mans tremblan, sia vista muossa clers segns da la vita. «A chasa füssa tuot sulet», declera'l e gioda üna da las bunas pastinas chi til sun gnüdas servidas insembel cul caffè. Davo che'l haja lavurà üna vit'intera as lascha'l uossa ün zich «servir», ha'l dit ed ha suottastrichà seis plets cun ün grond surrier. «Tuots guardan da mai e fan il meglder pussibel per ch'eu am sainta bain», ha'l dit e muossà cun seis man vers las chürunzas. Cha güsta il temp da Nadal saja bel. «Düraint las Festas vaina bleras visitas ed adüna darcheu cumpagnia», manzuna'l. Daplüs sentimaints o emozziuns nu resainta'l persunalmaing düraint il greiv temp'. «Per mai esa uossa quia tuot on Nadal», s'allegra'l.

### «I dà eir larmas»

«Güsta avant Nadal vezzaina eir larmas», disch Franziska Angerer da Susch, chürunza pro la Chüra Lischana. Cha tschertas abitantas ed abitants da la staziun da chüra da l'ospidal hajan schon daplüssas emozziuns düraint quel temp co in oters lös. «Nus savain quai e fain tuot il pussibel per cha nossa glied possa lura listess passantar pro'nus ün bel temp», disch'la. A la dumonda co ch'ella resainta persunalmaing il temp da Nadal düraint sia lavur respuond'la: «I nun es simpel da verer a glied trista...». Ma cha quai tocca però pro'l manster e cha cun quel as stopcha pu-



Franziska Angerer e Susanne Hohmann fan sco tuot il rest dal persunal da la Chüra Lischana tuot per cha lur clientella possa passantar cun e pro ellas bellas Festas.  
fotografia: Martina Fontana

dair viver. «Düraint il temp d'Advent, il Nadal e la müdada da l'on as stoja esser ferm e provar da laschar ils problems dals paziants illa chüra e nu tils tour cun sai a chasa», decler'la.

Cha quai funcziuna pro ella vairamaing ter bain, «ma ün o tschel evenimaint resta listess e pissera lura eir illa vita privata per emozziuns», conced'la. Per ella es il temp tanter festas però ün bun temp: «Nus fain pastinas, fain ün grond chalender d'Advent, quintain istorgias da Nadal e provain uschè dad imbellir il minchadi da nossa clientella», disch'la. Ella as giavüscha per l'avegnir cha blera glied gnia a far visitas a lur amis o confamigliars eir düraint l'on. «Da Nadal han tuots il bögn da far quai – l'on es però lung e nossa glied spetta cun brama cha qualchün gnia forsa eir da prümavaira, d'instà o d'utuon a tils visitar», conclud'la.

Susanne Hohmann es daspö ün on manadra da la staziun da la Chüra Lischana. Eir ella resainta il temp da Nadal cun seis paziants in differents möds: «Nus nu pudain però dar la cuolpa dad emozziuns e sentimaints be al Nadal», decler'la. Cha quel temp saja eir il cumanzamaint da l'inviern e cun quai eir il cumanzamaint da grippas e malesser. «Nossa lezcha esa da contemplar e d'intervgnir cur chi fa dabsögn.» Cha quai stopcha gnir fat cun calma e quietezza. «Panica e reacziuns massivas füssan in quels mumaints il pês chi's pudess far», intun'la. La lavur sün la staziun vain partida sü düraint il temp da festas: Sco cha Hohmann disch, lavura üna mità dal persunal a Nadal e tschella a Silvester. Sco ch'ella disch, vegnan chantadas da quist temp chanzuns, servits buns pasts e passantà da cumpagnia bels mumaints: «Nadal vegn e va – uschè sco nus eir.»